

PIRENÈWS

Eth periòdic des Pirenèus



Plantegen bastir un parc tematic damb mès de 20 otèls en miei des Pirenèus

Diuèrses entitats ecologistes denóncien qu'encara se fomenta un modèl toristic massificat

Eth grop d'inversors internacionaus defen que se crearien ena zòna uns 4.000 nauï lòcs de trabalh



Era ubicacion se trobarie en quauque punt entre era Val d'Aran e eth Cap de Creus, enes Pirenèus catalans.

Segon a pogut saber aguest diari, un grop d'empresaris e inversors internacionaus estudien era possibilitat de desvolopar, en miei des Pirenèus, un macro-projècte liderat per un parc tematic dedicat ara nhèu.

Eth projècte, que s'a filtrat ara premsa, includís eth bastiment de mès de 20 otèls, restaurants, centres comerciaus, dues sales entà concèrts e pistes d'esquí,

entre d'auti equipaments.

S'i harien tot tipe d'activitats, com er esquí, eth patinatge en gèu, es passejades a shivau, eth tir damb arc, es excursions damb raquetes de nhèu, es rotes damb mòto de nhèu e tanben i aurie un circuit d'aventura entara mainadèra.

Era inversion poirie superar es 1.000 milions d'euros e se crearien uns 4.000 lòcs de trabalh.

Peth moment se desconèish era localizacion qu'acuelherie eth parc tematic, maugrat que semble que i a diuèrses opcions ath dessús dera taula. Diuèrsi grups ecologistes ja an lançat un crit d'alèrta e avertissen que non permeteràn mès impactes en territòri que se basen en un modèl de torisme massificat.

Es inversors internacionaus

- Ètz un grop internacionau d'inversors e empresaris. Cercatz ua zòna en Pirenèu catalan entà desvolopar-i eth vòste projècte: un gran parc tematic dedicat ath mon dera montanha e era nhèu damb atraccions, zònes esportives e de léser, otèls, restaurants, zònes comerciaus e espacis entà grani concèrts.
 - Auetz experiéncia coma empresaris e tanben auetz desvolopat projèctes semblanti en d'auti païsi, mès auetz un 'petit' handicap: non coneishetz aguest territòri en detalh ne i auetz cap de ligam. Alavetz, ei possible qu'ajatz de besonh era ajuda e era implicacion de diferenti actors entà poder executar eth projècte coma cau.
-

ES VÒSTI ARGUMENTS

- Auetz ua manca importanta de consciéncia ambientau, per simple desinterès o per manca de coneishença. Non ètz guaire receptius deuant dera argumentacion ecologista.
- Era vòsta prioritat serà poder executar eth projècte entà recuperar era inversion e poder generar beneficis tanlèu que pogatz.
- Sabetz, pes experiéncias anteriores, qu'eth projècte generarà controvèrsia e ua fòrta oposicion de quauqui collectius locaux. Alavetz, ja vos podetz imaginar es arguments contraris que gesseràn.
- Entà deféner eth vòste projècte e sajar de cercar supòrts emplegaratz coma argument principau: qu'eth projècte portarà riquesa en territòri e generarà ua quantitat importanta de lòcs de trabalh (uns 4.000). Se basatz eth discors en açò, vos poiratz estauviar d'aites qüestions polemiques, com era nautada qu'auràn es bastisses, era distribucion energetica qu'auratz de besonh, eth consum d'aigua que i aurà en complèxe... Podetz méter er exemple de d'auti parcs tematics qu'an portat riquesa, lòcs de trabalh e sòs aqui a on s'an establits.
- Tanben podetz méter condicions ara administracion, en ua sòrta de 'chantatge': reactivaratz era economia dera zòna (segon vosati) mès a cambi vòletz ua rebasha fiscau o bonificacions que hèsquen a desaparéisher diferenti empediments burocratics e dera legislacion ambientau.

Es grops ecologistes

- Ètz diferenti grops ecologistes, quauqu'uns plaçadi en Pirenèu catalan. Auetz entenut pera premsa qu'un grop d'empresaris internacionaus an intencion de crear un parc tematic en quauque endret encara non concretat deth Pirenèu. Dempús de liéger era letra petita dera notícia, vo'n portatz es mans en cap e rapidaments vos activatz entà obtier-ne mès informacion.
 - Portatz fòrça ans treballant entath desenvolopament sostenible e respectuós damb er entorn, lutant contra eth cambi climatic e hèn un trabalh important d'educacion ambientau entara societat. Trobatz qu'eth futur parc tematic atempte contra es valors que defenetz.
-

VOS ARGUMENTS

- Evidentaments, ètz d'acòrd qu'es persones poguen auer un trabalh entà guanhar-se era vida (es empresaris defenen que crearàn uns 4.000 lòcs de trabalh en territòri) mès defenetz un modèl economic diferent, alternatiu, mens agressiu damb er entorn e aluenhat d'un torisme massiu que mau-met eth patrimonni naturau. Fomentatz eth desenvolopament de petiti projectes sostenibles e en hilat.
- Vatz a per totes. Non vedetz possible qu'eth projecte s'adapte ara normativa existenta e respècte eth mèdi ambient e per aquerò reclamatz que se retire completaments e que jamès s'amie ara practica.
- Cercatz eth supòrt des partits politics o, aumens, qu'escoten es vòstes peticions.
- Vos podetz amassar damb associacions de vesins e culturaus deth territòri entà arténher un major consens e auer mès fòrça entà influir enes negociacions.
- En cas qu'es partits politics e eth Govèrn arriben a un acòrd damb es empresaris entà amiar a tèrme eth parc tematic, podetz prepausar era realizacion d'un referèndum entà que sigue eth pòble, de manèra democratica, qui decidisque eth futur deth territòri.
- Podetz hèr accions de protèsta originaus e mediatiques entà poder aparéisher enes mejans de comunicacion.

Eth Govèrn dera Generalitat o deth Conselh Generau d'Aran

- Ètz un des actors principaus deth jòc e era responsabilitat finau d'autorizar eth projècte deth parc tematic o, ath contrari, forçar-ne era retirada, serà vòsta.
- Tant es partidaris deth parc tematic coma es sòns detractors vos pressionaràn e voleràn que vos placetz favor d'eri. Per aquerò auratz de hèr equilibris entà gestionar era situacion sense qu'acabe en un conflicte entre es dues parts.
- Vosati, d'entrada, ètz a favor deth projècte deth parc tematic perque voletz que se creen lòcs de trabalh ena zòna e trobatz qu'ei ua prioritat reactivar era economia. Totun, non ètz disposadi a cedir deuant de totes es exigéncias deth grop d'empresaris e defenetz que s'an d'acuelher ara normativa fiscau e ambientau en aplicacion.
- Quauqu'ues des entitats bancàries que vòlen participar en projècte vos pressionen entà que les detz eth permís. Aguestes entitats son es madeishes que vos an concedit crèdits enes darrèri ans entà finançar es vòstes campanhes electoraus.

ES VÒSTI ARGUMENTS

- Era vòsta prioritat ei era reactivacion economica e ètz un grop que defen eth sistèma economic liberau. Per aquerò, pensatz que se i a un grop d'inversors que vòlen portar sòs e riquesa en parçan, ac cau profitar.
- Tanben pensatz que serie ua bona manèra de melhorar eth deficit presupostari dera Generalitat/Conselh, ja que i aurie un augment d'ingrèssi publics a trauès des impòsti que pagarien es constructors deth parc
- Igual qu'eth grop d'empresaris, podetz relheuar es beneficis deth projècte, e era creacion d'aucupacion que representarie. Totun, non ètz disposadi a cedir a totes es sues exigéncias en çò que tanh ara relaxacion dera legislacion ambientau, per exemple.
- No vos voletz méter ara gent deth territòri en contra e defeneratz un projècte qu'afècte ath minimum er entorn e eth mèdi ambient.

Partits politics ena oposicion

- Ètz un grop eterogenèu de partits politics que non ètz en poder en aguest moment. Era majoria credetz en un modèl economic diferent, que priorize era conservacion e eth respècte peth mèdi ambient. Mès çò que mès vos apròpe e vos amasse en aguesti moments, maugrat es diferents ideologies, ei que voletz utilizar era estratègia de desgastar ath Govèrn entà poder auer mès opcions de ganhar e accedir entath poder enes eleccions que vien.
- Entà hèr fòrça tapatge mediatic, vos posicionatz damb es grups ecologistes e es entitats vesiaus e culturaus que non vòlen eth projècte.
- Podetz organizar actes de protèsta o participar enes actes organizadi pes agropacions de defensa deth territòri.
- Laguens des vòsti partits politics auetz personas que non i son d'acòrd: bailes de quauqu'un des municipis a on se poirie plaçar eth parc tematic e que lo ven damb boni uelhs, perque volerien beneficiar-se des ingrèssi peth pagament d'impòsti qu'aguest projècte generarie. Auratz trabalh entà anar toti a ua...

ES VÒSTI ARGUMENTS

- Seratz era votz des entitats ecologistes, vesiaus e culturaus en Parlament.
- Ètz d'acòrd damb era creacion de lòcs de trabalh, mès non pas ath prètz que sigue. Non pòt èster qu'entà crear 4.000 lòcs de trabalh se mete en risc ua part importanta deth patrimòni naturau des Pirenèus, includint abitats e espècies de flòra e fauna sensibles.
- Meteratz fòrça enfasi ena part deth projècte qu'agravarie eth problèma deth cambi climatic: criticaratz es consums energetics e d'aigua qu'aurie eth parc tematic e eth sòn modèl insostenible damb er entorn.
- Podetz estimular era creacion d'ua plataforma que s'opòse frontaments ath projècte e qu'amasse de manèra transversau es diferents entitats deth territòri (partits politics, associacions vesiaus, culturaus, ecologistes...).

Ostalèrs, restauradors, comercçants

- Representatz es interèssi des empresaris ostalèrs, restauradors e des botigues de granes mèrques comercçaus que s'installaràn laguens deth complèxe deth parc tematic des Pirenèus.
 - Credetz en projècte e lo defenetz, pes granes possibilitats de negòci que vos aufrís. Segontes eth grop impulsor deth projècte, seràn centenats de milèrs es persones que visitaràn er espaci cada an, de manèra qu'es ingrèssi que se poirien generar serien fòrça importanti.
 - Eth Parc tematic vos aufrís era possibilitat de hèr naues inversions e hèr a créisher es vòstes empreses respectives, en tot aumentar tanben era facturacion e eth nombre de treballadors contractadi. Seríetz uns grani generadors d'aucupacion deth projècte.
-

ES VÒSTI ARGUMENTS

- Pensatz qu'es grops ecologistes tostemp meten empediments ath desvolopament economic e non permeten que se reactive era economia dempús des grèus crisis economiques encadiades enes darrèri ans.
- Credetz que non ei decent que i age oposicion a un projècte qu'estime crear uns 4.000 lòcs de trabalh dirècte.
- Podetz defèner que, dera madeisha manèra qu'ena còsta catalana (era Còsta Daurada), eth gran parc de Pòrt Aventura a portat riquesa, prosperitat e aucupacion tara zòna, tanben ac harà eth parc tematic des

Pirenèus. En aguest sens, voletz convèncer as sceptics que cau seguir eth modèl de bona acceptacion qu'a agut Pòrt Aventura e d'auti parcs tematics semblanti. 'Se foncione en d'auti lòcs, tanben pòt foncionar aciu'.

- Auetz fòrça bona relacion damb eth grop que represente ath Govèrn dera Generalitat / Conselh Generau d'Aran, perque un des conselhèrs auie estat representant dera patronau des ostalèrs. En aguest sens, auetz cèrta capacitat d'influència ena presa de decisions deth Govèrn e vo'n voletz profiter.

Petiti productors deth territòri

- Ètz un grop qu'amasse es petiti productors dera zòna des Pirenèus: pagesi, apicultors, panadèrs, artesans... Vos auetz assabentat deth projècte deth parc tematic a trauès dera premsa e ètz molesti perque non s'a comptat bric damb vosati e perque vedetz a perilhar encara mèns era subervivença des vòsti petiti projèctes.
 - En cas de desvolopar-se eth parc tematic, credetz que favorirà as granes mèrques comerciaus, mèns non pas as vòstes, perque es otèls, restaurants e comèrci qu'ei previst que s'i hèsquen non serviràn es productes de proximitat deth territòri, mèsalèu n'aufriràn d'auti de dehòra, a prètzi baishi, e qu'an ath darrèr granes campanhes publicitàries e de mercandatge.
-

ES VÒSTI ARGUMENTS

- Deuant d'aguest panorama, podetz decidir amassar-vos damb es associacions ecologistes, culturaus e vesiaus, que tanben semble que s'oposaràn ath projècte de bastiment deth parc tematic.
- Eth projècte non favorirà es interèssi dera poblacion locau ne des productors locals. perque serà desvolopat per persones de dehòra que non comptaràn damb es productes deth territòri e qu'ath delà, seguraments, s'emportaràn e invertiràn es beneficis generadi luenh d'ací.
- Podetz considerar d'amassar-vos damb era plataforma unitària que poirien crear es entitats e quauqu'uns des partits politics damb er objectiu de non demorar damb es mans enes pòches e trabalhar entà arturar eth projècte tan lèu que se pogue.
- Pensatz qu'era administracion aurie de promòir e impulsar es petiti productors que s'opòsen ath modèl productiu industriau e que favorissen ues relacions laboraus mèns justes, que minimizen eth consum d'energia e era generacion de residus. En aguest sens, pensatz qu'eth parc tematic va contra aguesti valors e non lo voletz, ne en casa vòsta, ne enlòc.

Parcs Naturaus deth Pirenèu

- **Es directors de diferenti parcs naturaus deth Pirenèu catalan vos amassatz entà poder deféner amassa e més efectivament es interèssi d'aguesti espacis protegidi: es Parcs Naturals de la Zona Volcànica de la Garrotxa, deth Cap de Creus, des Capçaleres del Ter i del Freser, deth Cadí-Moixeró e der Alt Pirineu. Tanben integratz ath Parc Nacionau d'Aigüestòrtes i Estany de Sant Maurici e d'alti espacis naturaus protegidi, coma eth Massís del Pedraforca o era Albera.**
- **Segontes semble, eth Govèrn dera Generalitat / Conselh Generau d'Aran non vos hèn a participar dirèctaments deth debat sus era construccion deth parc tematic e non i ètz d'acòrd perque pensatz qu'auetz fòrça causes a díder.**

ES VÒSTI ARGUMENTS

- Voletz participar dera decision o debat sus eth bastiment deth parc tematic e atau ac demanatz as organs superiors dera Generalitat / Conselh Generau d'Aran, hèn a sénter eth vòste malestar entà non auer-ne estat informadi per auança.
- Auetz entenut a díder, a trauès des mejans de comunicacion, qu'es empresaris impulsors deth projècte demanen ua relaxacion dera normativa ambientau e poder començar es òbres abans dera realizacion deth corresponent Informe d'Impacte Ambientau. Se se hesse realitat, poirie establir un precedent fòrça perilhós en futurs projèctes e ac voletz evitar.
- Podetz demanar ua reünion damb es diferenti grops politics e eth Govèrn.
- Ètz preocupadi perque, peth moment, i a ua incertitud totau sus era ubicacion concrèta deth futur parc tematic e vos preocupe que pogue afectar ath territòri includit en quauqu'uns des espacis protegidi deth Pirenèu catalan.
- Pensatz-vos se voletz pressionar ath Govèrn entà que non se dèishe convèncer pes exigéncies des empresaris e mantengue, ath pè dera letra, era legislacion ambientau e fiscau actuau. Per un aute costat, com qu'eri son es vòsti superiors, podetz decidir hèr sonque aquerò que vos diguen.

Associacion de personas en caumatge

- Ètz un grop de personas de mejana edat e que portatz longtemps en caumatge. Maugrat qu'auetz hèt ua recèrca activa de trabalh, non trobatz oportunitats laboraus e ètz en ua situacion limit, tant a nivèu economic (era prestacion per desmeplec que crubatz ei fòrça redusida e non vos permet pagar-vos es despenses), com de benestar emocionau.
 - Voletz trobar un trabalh entà melhorar era vòsta situacion economica, mès tanben entà restaurar era vòsta autoestima e poder-vos sénter un aute viatge personas utiles e non marginades peth mercat professionau.
 - Ètz organizades en ua associacion sense interès lucratiu qu'impulsa diferents activitats socials e solidàries.
-

ES VÒSTI ARGUMENTS

- Coma uns auti des protagonistes d'aguest ahèr, auetz coneishut eth projècte deth possible bastiment deth parc tematic des Pirenèus pera premsa.
- D'entrada, ètz illusionadi perque poirie èster ua bona oportunitat entà tornar ath mercat laborau e poder auer un trabalh mès o mens estable. Pensatz que i aurà ua major demanda de trabalh, perque se crearàn uns 4.000 lòcs de trabalh, e que vosati ne poirietz gèsser beneficiadi.
- Auetz ganes que se desvolope eth projècte e que non i meten empèdiments.
- Non comprenez era posicion des grups ecologistes ne des partits pol-
itics dera oposicion e vos hè ràbia que non pensen en vosates ne enes vòstes possibilitats professionaus.
- Vos trobatz en un moment de besonh extrem e pensatz que dar solucion a situacions com era vòsta aurie d'èster fòrça mès prioritària qu'es consideracions mèdiambientaus o sus eth cambi climatic, perque pensatz que jòguen damb eth vòste pan.
- Podetz pensar en demanar quauqua amassada damb es diferents partits politics e damb eth Govèrn dera Generalitat / Conselh Generau d'Aran entà hèr-les a saber es vòstes peticions de manèra dirècta.

Agéncies de viatges e d'auti

- Vos auetz assabentat deth projècte a trauès des mejans de comunicacion e d'entrada vedetz eth projècte damb boni uelhs, perque vos poirie daurir naues possibilitats de negòci.
 - Poiríetz arribar a un acòrd damb es ostalèrs, restauradors, comercants e d'auti empresaris deth futur parc tematic entà enviar-i centenats d'autobusi de toristes cada an e repartir-vos eth 'negòci'.
 - Poiríetz aufrir paquets e experiéncias de dimenjada en futur complèxe damb activitats programades, sejours enes otèls e dinars includidi.
-

ES VÒSTI ARGUMENTS

- Era construccion deth parc tematic semble que vos pòt interessar entà aufrir naues destinacions laguens des vòsti paquets d'activitats.
 - S'eth complèxe toristic se convertís en un motor d'atraccion de visitants de tot eth mon, coma semble que preven es sòns impulsors, vosati tanben ne poiríetz trèir profit gràcies ar augment deth volum de trabalh e de clients e, per tant, dera facturacion des vòstes empreses.
 - Poiríetz preveir era possibilitat de crear bèth tipe de ligam o associacion damb era rèsta d'actors implicadi que son favorables ath bastiment deth parc tematic (es ostalèrs, es restauradors o es empreses d'activitats esportives de montanha), damb er
- objectiu de hèr pression ara administracion entà que permeter-se eth desvolopament deth projècte.
- Tanben poiríetz demanar ua reünion damb era administracion (Govèrn dera Generalitat o sindica d'Aran) entà deishar clara era vòsta posicion.
 - Deuant un possible debat damb es actors contraris ath parc tematic, vosati pensatz qu'era prioritat ei era recuperacion economica, encara qu'aguesa se hèsque damb projèctes qu'agen un impacte e un còst ambientau naut. En aquest sens, vedetz es arguments ecologistes coma un fren entath progrès economic.

Empreses d'espòrts de montanha

- Ètz un des grops mès eterogenèus e damb mès complexitat e debat intèrn, ja que l'integratz granes empreses d'espòrts d'aventura, petites empreses e autonòms. Vos dedicatz a hèr guidatges o gestionar activitats, coma per exemple raquetes de nhèu, esquí de montanha, etc.
 - D'entrada, se poirien crear dues posicions contràries laguens deth grop: era part que representatz as granes empreses seríetz a favor deth parc tematic pes possibilitats de negòci que vos aufrís. Era rèsta, per contra, auríetz optat pera desconfiança e vedetz damb maufidança eth bastiment deth complexè toristic perque fomenta un modèl massificat que non ei coherent damb era vòsta manèra de compréner era montanha.
-

ES VÒSTI ARGUMENTS

- Es representants des granes empreses d'espòrts pensatz qu'eth parc tematic permeterie a fòrça personas gaudir dera natura e sustot a vosates gaudir d'importanti beneficis.
- Es petiti empresaris e autonòms, per contra, auetz bona sintonia e relacion damb es gestors des Parcs Naturaus e vos sentetz mès apròp dera sua posicion en defensa deth territòri e des sòns valors naturaus. Ath delà, eth futur parc tematic tanpòc semble que vos pogue generar guaires possibilitats de trabalh, ath delà d'èster absorbits pes granes empreses deth sector e trabalhar entada eri, en cas que, deuant der augment dera demanda d'activitats, agen de besonh d'aumentar eth nombre de treballadors.
- Tanben ètz sensibles ara conservacion des valors naturaus, des abitats e ecosistèmes e ètz a favor dera proteccion dera flòra e era fauna des Pirenèus. Pensatz qu'eth bastiment deth parc tematic non ei compatible damb aguesti valors.

Instruccions deth jòc de ròtle e decision finau




DELIBERACIONS INICIAUS

- **A trauès dera descripcion des diferenti personatges e des sòns arguments inicials, facilitadi en aguesta guida, vos auetz de méter ena pèth des actors implicadi en procès e que vos a tocat representar. Pensatz qué suposarie entà vosati eth bastiment d'aguest parc tematic enes Pirenèus.**
- **A compdar d'ací, auetz d'analisar quini serien es avantatges, es oportunitats e es inconvenients e debaté'c laguens deth grop de cada personatge, entà dar forma ara vòsta opinion.**
- **Entà acabar aguesta prumèra part deth jòc, vos auratz de posicionar sus eth projècte e decidir s'ètz d'acòrd damb era sua construccion, se voletz que se pòrte ara practica mès damb matisi o milhores que i volgatz incorporar, o se vos posicionatz totauments en contra.**

Instructions du jeu de rôle et décision finale

ERA DECISION FINAU

- Ara que ja auetz clara era vòsta posicion e argumentacion a nivèu des diferenti personatges, se tracte que pogatz arribar a decidir entre totes e toti eth futur deth parc tematic e des Pirenèus.
- Se tracte, en aguest cas, d'un finau dubèrt a on podetz trigar diferenti camins entà arribar a ua decision. D'un costat, podetz deishar qu'era decision la prengue de manèra unilateralau eth Govèrn dera Generalitat / Conselh Generau d'Aran, dempús de parlar, amassar-se e suportar es pressions de totes es parts implicades. D'un aute costat, poiríetz arribar a un acòrd entara celebracion d'un referèndum o consulta populara a on toti (es diferenti personatges) poguen díder era sua opinion e votar. En aguest cas, eth resultat serie executòri e era decision, acordada.



Instruccions deth jòc de ròtle e decision finau

- **Tant s'escuelhetz era via unilaterau coma era deth referèndum, auratz de decidir com serà aquest ipotetic parc tematic: se s'acceptaràn es reclamacions dera equipa d'empresaris impulsors deth projècte (demanauen, per exemple, bonificacions fiscaus o ua eliminacion des traves burocratiques e relaxar era legislacion ambientau), e se rebaisharà era dimension deth projècte (se bastirà un parc tematic en ua superfícia mès petita, damb mens edificacions e mens consum energetic), o s'eth projècte se refusarà ath 100% e demorarà entà tostemp en un calaish.**
- **En cas que triguetz era votacion o consulta, abans de votar auratz d'escuelher ua persona que serà era representanta de cada personatge (per exemple, un representant des empresaris, un representant des grops ecologistes, etc). Es representants/es emeteràn eth vòt (ac podetz hèr a man lheuada) e justificaràn eth perquè der 'òc' o deth 'non' ath projècte, a compdar des arguments qu'auetz dat e debatut ath long dera prumèra part deth jòc.**

ENDEUANT, ETH FUTUR DES PIRENÈUS EI ENES VÒSTES MANS!